

आकाशवाणी जयपुर-अजमेर
प्रादेशिक समाचार
दिनांक : 09.03.2026 समय : 18.45 बजे

- प्रधानमंत्री नरेंद्र मोदी कह्यो-सार-संभाळ करण वाळां री दुनियाभर मांय बधती मांग देश रा लाखां नौजवानां सारु नौकरी-धंधा रा नुवा मौका बणा रही हैं
- विधानसभा राजस्थान पंचायती राज संशोधन बिल-2026 ध्वनिमत ऊं पास कीनों
- खेजड़ी अर दूजा खास रूखड़ा बचावण सारु करडो कानून बणावण ऊं जुड़ी समिति री आज पहली मीटिंग व्हीं
- राज्य रा केई हलकां मांय पारो 40 डिग्री सेल्सियस ने पार कीनो-काल अर 11 मार्च ने लंकाऊ-आतूणी हलकां मांय लू बाजण री शंकां

000

प्रधानमंत्री नरेंद्र मोदी कह्यो है के लारला कुछ बरसां मांय भारत रो स्वास्थ्य ढांचो और मजबूत बण्यो हैं वे 'सबका साथ सबका विकास दृ जनता की आकांक्षाओं की पूर्ति' मुद्दा माथे राख्यी ज्या वेबिनार मांय बोल रह्या हां श्री मोदी कह्यो के जनता री उम्मीदां पूरी करण माथे सरकार खास ध्यान दे रही हैं प्रधानमंत्री कह्यो के सार-संभाळ राखण वाळां री दुनियाभर मांय बधती मांग ऊं देश रा लाखां नौजवानां सारु कौशल आधारित नौकरी-धंधा रा नुवा मौका पैदा व्हे रह्या हैं

विधानसभा आज राजस्थान पंचायती राज संशोधन बिल- 2026 ध्वनिमत ऊं पास कर दीनों सदन मांय पंचायतीराज संशोधन बिल माथे व्ही बहस रे दौरान पंचायतीराज मंत्री मदन दिलावर कह्यो के पंचायत चुनाव लड़बा सारु दो ऊं बत्ता बच्चा नी व्हेवण री शर्त रो अबे कोई मतलब नी रह्यो हैं वे बतायो के ओ प्रावधान साल 1995 मांय आबादी माथे काबू करण रा मकसद ऊं लागू करी ज्यो हो, पण मौजूदा दौर मांय आबादी मांय बधवार री रेट मांय कमी अर बधती जागरूकता रे कारण इण री जरूरत नी हैं मंत्री कह्यो के ई नियम रे कारण केई अनुभवी अर लायक लोग चुनाव नी लड़ सक रह्या हा अर ई बदलाव रे जरिये वां ने मौको देवण रो फ़ैसलो करी ज्यो हैं

000

विधानसभा आज राजस्थान आयुर्वेद योग अर प्राकृतिक चिकित्सा विश्वविद्यालय अजमेर बिल-2026 ध्वनिमत ऊं पास कर दीनों बिल माथे व्ही चर्चा रो जवाब देता थकां आयुष मंत्री प्रेमचंद बैरवा कह्यो के ओ संस्थान योग अर आयुर्वेद रा हलका मांय राजस्थान री खास ओळखाण बणावेलां बैरवा बतायो के ओ विश्वविद्यालय खुलण ऊं प्रदेश मांय ईलाज रा देसी तरीका ने बधावो मिलेलां

प्रदेश मांय कृषि आदानां री सालाना जांच क्षमता 59 हजार ऊं बधा र 76 हजार 250 कर दीरीजी हैं कृषि मंत्री डॉ. किरोड़ी लाल मीणा आज विधानसभा मांय प्रश्नकाल रे दौरान आ जाणकारी दीनीं वे बतायो के हाल ताई 2 हजार 220 नमूना ठीक नी मिल्या है, ज्यां मांय ऊं एक सौ सत्रह मामलां मांय एफ-आई-आर दर्ज कराई जा चुकी हैं वे साफ कीनो के मौजूदा दौर मांय खेती-बाड़ी री अमानक सामग्री सारु काश्तकारां ने मुआवजो देवण रो प्रावधान नी हैं

000

प्रदेश मांय नुवी राजस्व इकाइयां बणावण अर मौजूदा इकाइयां मांय बदलाव सारु ज़रूरी कार्यवाही करी जावेलां राजस्व मंत्री हेमंत मीणा आज विधानसभा मांय आ जाणकारी दीनीं वे समिति री सर्वे रपट मिल्या पाछे आज प्रश्नकाल रे दौरान आज आ जाणकारी दीनीं

000

शिक्षा मंत्री मदन दिलावर कहयो है के प्रदेश री महात्मा गांधी अंग्रेजी स्कूलां मांय अध्यापकां रा ओहदा जरूरत रे मुताबिक बणायी ज्या हैं वे आज विधानसभा मांय बतायो के राज्य री लारली सरकार स्कूलां ने अंग्रेजी माध्यम मांय बदल दीना हा, पण वटे अध्यापकां रा ओहदा नी बणायी ज्या हां वे कहयो के मौजूदा सरकार हालात मांय सुधार कर रही है अर इन्टरव्यू रे जरिये काबिल शिक्षकां री नियुक्ति करी जा रही हैं

0000

प्रदेश मांय खेजड़ी अर दूजा खास रूखड़ा ने बचावण सारू नुवो कानून बणावण माथे विचार करण सारू बणायी ज्यी समिति री पहली मीटिंग आज व्हीं संसदीय कार्य मंत्री जोगाराम पटेल री सदरत मांय व्ही मीटिंग रे दौरान 'वृक्ष संरक्षण बिल' रा मजमून माथे चर्चा करण सागे दूजा राज्यां रा कानूनां रो तुलनात्मक अध्ययन करी ज्यों प्रस्तावित बिल रा तैत खेती-बाड़ी सारू जमीं सागे आवंटित, बदली कर्योडी अर आबादी वाळी गैर-कृषि जमीं रा रूखड़ा बचावण सारू करड़ा प्रावधान कर्या जावेलां ई पाछे घणो जरूरी व्हेवण री सूरत मांय संबंधित अहलकार री मंजूरी ले र रूखड़ा हटाया जा सकेलां बिल रो मजमून फाइनल करण सारू समिति री आगली मीटिंग 11 मार्च ने व्हेलां

000

कुनो राष्ट्रीय उद्यान मांय एक चीता ज्वाला पांच शावक जण्या हैं केंद्रीय पर्यावरण, वन अर जलवायु परिवर्तन मंत्री भूपेंद्र यादव सोशल मीडिया पोस्ट रे जरिये आ जाणकारी दीनीं वे मांड्यो के अब चीता रा देश मांय जन्म्या बच्चां री तादाद 33 व्हे ग्यी हैं श्री यादव इण ने देश रा चीता बचावण रा अभियान री एक और खास उपलब्धि बतायो वे बतायो के भारत मांय चीतां री तादाद 53 व्हे ग्यी हैं

000

आज कोटा रा मुकुंदरा हिल्स टाइगर रिजर्व मांय मध्यप्रदेश रा बांधवगढ़ टाइगर रिजर्व ऊं लायी ज्यी बाघिन एमटी-10 ने छोड़ी ज्यीं करीब साढ़े तीन साल री ई बाघिन ने 28 फरवरी ने कोटा लायी ज्यी हीं टाइगर रिजर्व रा फील्ड डायरेक्टर सुगनाराम जाट बतायो के बाघिन ने पैली झामरा घाटी मांय एक हेक्टेयर रा सॉफ्ट रिलीज एनक्लोजर मांय राख्यी ज्यी ही, जठे बाघिन री हलचल अर शिकार करण रा बूता माथे निजर राख्यी ज्यीं वे बतायो के अब एनक्लोजर रो दरुजो खोल्यां पाछे बाघिन आज्ञादी ऊं झामरा घाटी मांय घूम रही हैं बाघां ने एक ऊं दूजा राज्य मांय भेजण री परियोजना रा तैत प्रदेश मांय आ दूजी बाघिन लायी ज्यी हैं

00000

राज्य रा केई हलकां मांय फागण महीना मांय ई पारो 40 डिग्री सेल्सियस ने पार कर ग्यो हैं लारला चौबीस घंटां मांय पिलानी 40 दशमलव 2 डिग्री सेल्सियस तापमान सागे राज्य री सब ऊं उन्नी ठौड रह्यो ई बीचे राज्य रा घणखर हलकां मांय अधिकतम तापमान सामान्य ऊं 5 ऊं 10 डिग्री सेल्सियस ऊंचो चाल रह्यो हैं बाड़मेर मांय पड़ रह्या जोरदार तावड़ा रे कारण मौसमी बीमारियां रा मामला बधबा लाग्या है, जदके सिरोही मांय दोपहरां री बगत बाजारां मांय आवण-जावण कम व्हे ग्यी हैं सवाईमाधोपुर मांय ई संवारे री पोर ई गर्मी रो एहसास व्हेवण लाग्यो हैं ई बीचे मौसम विभाग काल अर 11 मार्च ने राज्य रा लंकाऊ-आतूणी हलकां मांय लू बाजण सारू चेतायो हैं

0000

प्रदेश मांय 'प्लास्टिक कचरा मुक्त अभियान' रा तैत 39 हजार किलोग्राम प्लास्टिक कचरो भेळो करी ज्यो हैं स्वच्छ भारत मिशन ग्रामीण रा तैत 16 ऊं 28 फरवरी तांई चलायी ज्या ई अभियान मांय 18 लाख 61 हजार जणा सक्रिय भागीदारी निभाई ई कचरा रा वैज्ञानिक तरीका ऊं निपटारा ऊं करीब दो लाख रुप्या री आमदनी ई व्हीं

000

पाली जिला री सोजत नगर पालिका मांय कचरो भेळो करण री व्यवस्था मांय साफगोई बधावण सारू क्यू-आर कोड आधारित वेस्ट ट्रैकिंग सिस्टम लागू कर्यो जावेलां नगरपालिका रा अधिशासी अधिकारी अचल सिंह गुर्जर बतायो के हर घर अर दुकान माथे खास क्यू-आर कोड लगायो जावेलां अधिशासी अधिकारी बतायो के ई व्यवस्था ऊं कचरो भेळो करण रा काम माथे डिजिटल तरीका ऊं निगराणी तैय करी जा सकेलां

.....

000

'एक भारत श्रेष्ठ भारत' अभियान रा तैत युवा संगम रा छठा दौर मांय नाम मंडावण रो काम चाल रह्यो हैं ई सारू अठारह ऊं तीस साल ताई उम्र रा नौजवान शिक्षा मंत्रालय रा पोर्टल माथे ऑनलाइन तरीका ऊं आधिकारिक वेबसाइट माथे अर्जी दे सके हैं ई सारू राज्य मांय जयपुर रा मालवीय राष्ट्रीय प्रौद्योगिकी संस्थान-एम.एन.आई.टी. ने नोडल संस्थान बणायी ज्यो हैं युवा संगम रा छठा दौर मांय चुण्या जावण वाळा नौजवानां ने दूजा राज्यां री पांच ऊं सात दिनां री सांस्कृतिक यात्रा माथे जावण रो मौको मिलेलां

000

अजमेर ज़िला री महिला किसानां रो एक दल आज दूजा ज़िलां रा दौरा सारू रवाना व्ह्यो 'आत्मा' योजना रा तैत कृषि विभाग री उप निदेशक उषा चितारा ई दल ने हरी झंडी बता र रवाना कीनों दल मांय ज़िला री न्यारी-न्यारी पंचायत समितियां री महिला किसान शामिल हैं ई दौरान दल रा सदस्य राजसमन्द, उदयपुर, प्रतापगढ़, चित्तौड़गढ़ अर भीलवाड़ा रा कृषि विज्ञान केन्द्रां रो दौरा करेलां वां ने खेती-बाड़ी री नुवी तकनीकां, जैविक खेती, भांत-भांत रा बीज अर पशुपालन ऊं जुड़ी जाणकारी दी जावेलां

000

सलूंबर ज़िला रा सराड़ा मांय महिलावां री हिफाजत अर वां ने मजबूत बणावण रा मकसद ऊं 'सुरक्षा सखी' कार्यशाला राख्यी ज्यी कार्यक्रम मांय कालिका पेट्रोलिंग यूनिट री महिला सिपाही महिलावां ने राजकॉप सिटीजन एप काम लेवण रा बारा मांय जाणकारी दीनीं कार्यक्रम मांय महिलावां ने वां रा कानूनी हक अर वां ने मजबूत बणावण ऊं जुड़्या प्रावधानां री जाणकारी ई दीरीजीं

000

पाली ज़िला मांय सत्तर साल ऊं बत्ती उम्र रा बुजुर्गां सारू चिकित्सा विभाग री ओर ऊं वय वंदना कार्ड बणावण बाबत खास शिविर लगाया जा रह्या हैं अ शिविर शहर रा हाउसिंग बोर्ड, नाडी मोहल्ला, टैगोर नगर, मंडिया रोड अर प्रताप नगर रा शहरी प्राथमिक स्वास्थ्य केंद्रां माथे लगाया जा रह्या हैं 14 मार्च ताई चालण वाळा आं शिविरां मांय मोटी तादाद मांय बुजुर्ग पूग रह्या हैं

0000